

四庫全書

子部

欽定四庫全書卷

類說目錄

卷二十五

炙穀子

容成氏

神化

心小而志大

良醫活人

見舌觀景

鵲巢懶穴

君子禁微

周公治魯太公治齊

鳥窮

九野

會稽竹箭

嫦娥

十月而生

黃龍負舟

金縢豹韜

臯陶瘖

一彈一徽

有餘

人可以微言乎

東家西家

汗漫期于九垓

兩蛟挾船

猩猩乾鵠

乘船遇風

酒濁其神

懼揜其氣

祭井竈等神

受秋駕

貴所有賤所短

人性

三勢二權

慎無為善

治無病之病

行合趣同

引重持輕

難跂

以小明大以近論遠

皆不宜言

沐髮

遺腹子

燕賀

魚無耳蟬無口
哭達泣絲

鬼神

三危

掘藏有殃

禍福

九賢千歲一出
扁鵲

英俊豪傑
由基神射

論將

玉泉子

稜等登科

王老

驢鳴狗吠

點鬼部算博士

一义手一韻成

九釘盤

百合草履

大帽子

席帽

金銀器皿

角弩

髻名

膩粉

水芝

燕雀名

雞五德

嘯十五章

科第放此風漢

金華子

來蘇隊舞

泥看街樓

亞相辱臺

點頭崔家

杜牧改名

阿武婆阿婆舞

艷寶

李郢詩

面部三無

孤進還丹

龍王誅水族

彭祖死

淮南子

自然之勢

所好為禍

共工觸不周山

兵強則滅

病化為虎

類說目錄

欽定四庫全書卷

類說卷二十五

宋 曾慥 編

炙轂子

容成氏

容成氏之時道路鴈行列處託嬰兒於巢上置餘糧
於晦首虎豹可尾虺蛇可踞至堯時羿誅鑿齒獸殺
九嬰斷脩蛇羿射十日繳大風萬民皆喜置堯為天
子晚世桀為璇室瑤臺象廊玉牀紂為肉圃酒池湯

放桀武王伐紂

神化

太上神化其次不得為非其次賞賢而伐暴

心小而志大

心欲小而志欲大智欲圓而行欲方能欲多而事欲
鮮

良醫活人

天雄烏喙藥之凶毒也良醫以活人侏儒瞽師人之

困憊也人主以備樂舜不降席而天下治桀不下陛而天下亂

見舌觀景

老子學商容見舌而知守柔矣列子學壺子觀景柱而知持後矣

鵲巢獺穴

鵲巢知風之所起獺穴知水之高下暉日知晏陽諧知雨

君子禁微

積羽沉舟羣輕折軸故君子禁於微

周公治魯太公治齊

太公問周公何以治魯曰尊尊親親太公曰魯從此弱矣周公問曰何以治齊太公曰舉賢而上功周公曰後世必有劫殺之君其後齊日大至於霸二十四世而田氏代之魯日益削至三十二世而亡

鳥窮

諺曰鳥窮則喙獸窮則角人窮則詐

九野

何謂九野中央曰鈞天東曰蒼天東南曰蠻天北曰
玄天西北曰幽天西曰昊天西南曰朱天南曰炎天
東南曰陽天

會稽竹箭

梁山犀象華山金石顧山珠玉幽都筋角

嫦娥

羿請不老之藥於西王母嫦娥竊以奔月

十月而生

精神受於天形體稟於地一月而膏二月而腴三月而胎四月而肌五月而筋六月而骨七月而成八月而動九月而躁十月而生

黃龍負舟

禹省方濟于江黃龍負舟舟中之人五色無主禹笑曰我受命于天生寄也死歸也何足以滑和視龍猶

螭龍乃弭耳掉尾而退

金縢豹韜

通許由之論金縢豹韜廢矣延陵季子不受吳國而
訟閒田者慚矣金縢豹韜周公太公隱謀圖王之書
也

臯陶瘖

臯陶瘖而為大理天下無冤刑師曠瞽而為太宰晉
無亂政

一彈一徽

榮啓期一彈而孔子三日樂感乎和鄒志一徽而威王終夕悲感于憂

有餘

求水火莫不與者所饒足也林中不賣薪湖上不鬻魚所有餘也

人可以微言乎

白公問孔子曰人可以微言乎若山投水中如何曰

善沒者能取之矣曰以水投水如何曰淄渑之水合
易牙嘗而知之矣

東家西家

趨舍禮俗猶室家之居東家謂之西家西家謂之東
家雖臯陶之禮不能處

汗漫期于九垓

盧敖遊北海見一士深目而玄鬢淚注而鵞肩豐上
而殺下見敖下其臂方居龜殼而食蛤蜊敖曰子可

與教為友乎若士笑曰吾與汗漫期于九垓之外舉
臂竦身入雲中

兩蛟挾船

荆有俠飛渡江至中流陽侯之波兩蛟挾船俠飛拔
劍曰武士可以仁義說也不可劫而奪也此江中之
腐骨朽肉秉劍而赴江刺蛟斷其頭船中人盡活

猩猩乾鵠

猩猩知往而不知來乾鵠知來而不知往猩猩知人

姓字此知往也醉以擒身此不知來者乾鵲鵲也人有來則鳴此知來也知歲多風巢于木枝人皆探其卵故曰不知往也

乘船遇風

楚人有乘船遇大風者波至自投於水非不貪生而畏死也惑於恐死而反忘生也人之嗜欲亦猶此爾酒濁其神

醉者俛而入城門以為七尺之閭超江淮以為尋常

之瀆酒濁其神也

懼揜其氣

怯者夜見立表以為鬼見寢石以為虎懼揜其氣也
祭井竈等神

今世祭井竈門戶箕帚臼杵者非以其神為能享之
也懼頑其德煩苦之無已也

受秋駕

尹儒學御三年中夜夢受秋駕於師明日朝師師曰

今日將教子秋駕儒曰臣有大幸今夕故夢受之

貴所有賤所短

王子慶忌死於劒羿死於桃梧子路醢於衛蘇秦死於齊人莫不貴其所有賤其所短

人性

凡人之性少則猖狂壯則暴強老則好利

三勢二權

將有三勢二權將充勇而輕敵卒果敗而樂戰此為

氣勢一人守隘千人弗過此謂地勢因其急亂擠其
揭揭此謂因勢善用間諜出於不意此謂知權陳卒
正前傷敵者衆此謂事權

慎無為善

人有嫁女子曰爾行矣慎無為善曰將為不善耶曰
善且弗為況不善乎

治無病之病

良醫者常治無病之病故無病聖人常治無患之患

故無患

行合趣同

因媒而嫁不因媒而成因人而交不因人而親行合趣同千里相從趣不合行不同對門不通

引重持輕

寧百刺以針無一刺以刀寧一引重無久持輕寧一月饑無一旬餓

雞跖

天下無粹白狐而有粹白之裘擗之衆白也善學者
若齊王食雞必食其跖

以小明大以近論遠

嘗一臠肉知一鑊之味懸一羽炭知燥濕之氣以小
明大也見一落葉知歲之將暮睹瓶中冰知天下之
寒以近論遠也

皆不宜言

祭之日而言狗生取婦之日而言衰麻置酒之日而

言上塚渡江河而言陽侯之波皆不宜也

沐髮

沐者墮髮猶為之不止所去者少所利者多

遺腹子

不思其父無見於心也不夢見像無形於目也

燕賀

湯沐具而蟻虱相吊大厦成而燕雀相賀

魚無耳蟬無口

鬼絲無根而生蛇無足而行魚無耳而聽蟬無口而鳴

哭達泣絲

楊子見達路而哭為其可以南可以北墨子見練絲而泣為其可以黃可以黑

鬼神

炎帝於火死而為竈禹勞天下死而為社后稷作稼穡而死為稷羿除天下之害死為宗布此鬼神之所

以立

三危

天下有三危少德多寵一也才下位高二也身無大功而有厚祿三也

掘藏有殃

再實之木其根必傷掘藏之家必有殃

禍福

有陰德者必有陽報有陰行者必有昭名宋人好善

家無故黑牛生白犢父子無故而盲其後楚攻宋丁壯者死老幼皆上城城破皆屠之獨父子盲得無乘城圍解則父子俱視塞上有善術者馬無故而亡入胡其父曰何遽不為福乎數月馬歸父曰何遽不為禍乎其子好騎而折髀人弔之父曰何遽不為福乎居一年胡人入塞丁壯引弦而戰死十九獨以跛故父子相保

九賢千歲一出

堯眉八采九竅通洞一言而萬民齊舜二瞳子是謂
重明禹耳滲漏是謂大通文王四乳是謂大仁臯陶
鳥喙是謂至信啟生於石紐契生於卵史皇產而能書
羿左臂脩而善射此九賢千歲一出

扁鵲

所貴者非貴其隨病調藥貴其摩息脉血知疾之所
從生也所貴聖人者非貴其隨罪鑒刑貴其知亂之
所起

英俊豪傑

才過萬人謂之英千人謂之俊百人謂之豪十人謂之傑

由基神射

楚王獵見白猿射之猿善避箭莫能中乃命養由基射方執弓猿乃抱樹而號始知由基神射也

論將

將有三隊四義五行十守三隊者上知天道下習地

形中察人情四義者便國不負兵為主不顧身見難
不畏死決疑不辟罪五行者柔不可卷剛不可折仁
不可犯信不可惑勇不可凌十守者神清謀遠操固
知明不食於貨不淫於物不盻於神不推於方不可
喜不可怒國不可從外治軍不可從中御也

玉泉子

稜等登科

故事放榜畢旅謝時宰榜首致詞有丁稜者語吃欲

言稜等登科趨前連聲曰稜等登竟不成語而退

王老

王元寶富厚以錢文如其名因呼錢為王老

驢鳴狗吠

庾信自南朝至北方惟愛溫子昇所作寒山寺碑或問信北方何如曰唯寒山寺一片石堪共語餘若驢鳴狗吠

點鬼簿算博士

王楊盧駱有文名人議其疵曰楊好用古人性名謂之點鬼簿駱好用數對謂之算博士

一义手一韻成

溫庭筠文思敏妙李義山嘗得句云遠比趙公三十八年宰輔溫對曰近同郭令二十四考中書溫每作賦一义手一韻成令狐綯多託為文惡其漏語疎之溫謗曰中書豈坐將軍處耶譏其不學也

九釘盤

唐御厨進饌用九盤裝累名九釘盤

百合草履

大厯中進五朶草履中間進百合草履

大帽子

本野老之服後魏戴之唐初以紗縠為之以隔風埃

席帽

本羌服以羊毛為之秦漢鞞以故席女人亦戴之四緣垂綢子飾以珠翠謂之席帽煬帝幸江都御紫雲

樓觀市欲見女人姿容詔令去網子

金銀器皿

夏商始用金銀器皿

角弩

夷牟置角弩馬上用之步敵則木弩漢軍有八斗弩
以射楚營矢及十里

髻名

髻者繼也女子必有繼於人女媧氏以羊毛繩之向

後繫之以荆木竹為之笄貫髮赫連氏造梳二十四齒取疎通之義堯舜以銅為笄舜加女人首飾釵梳雜以象牙玳瑁為之間以玉髻上加朱翠翹花傅之鉛粉其商髻名鳳髻又有雲髻加之步步而搖故曰步搖始皇宮中梳望仙髻漢宮有迎春髻漢武時諸仙從王母下降皆梳飛仙髻盤龍髻貫以鳳首釵孔雀搔頭雲頭篦掃八字眉漢明帝宮人梳百合分稍髻同心髻掃青黛蛾眉魏武宮人掃連頭眉晉惠帝

宮人梳芙蓉髻通草五色花子掃黑墨眉一畫連心
細長曰仙蛾粧隋文華宮中梳九貞髻唐武德中梳
平蕃髻長樂髻開化中梳雙鬟望仙髻貞元作偏髻
子

膩粉

秦穆公女弄玉善吹簫蕭史降於宮掖鍊飛靈丹第
一轉與弄玉塗之名曰粉今之水銀膩粉也燕脂本
閼氏夫人以紅花為之中國人呼紅藍

水芝

蓮花一名水芝一名水華芡鷄頭也一名鴈頭

燕雀名

鷺一名天女鵲鳥又曰玄鳥又曰乙昔娥得燕卵吞之生商子姓後以乙為孔字雀一名嘉賓言集人家屋如賓客

鷄五德

鷄一名獨夜一名司晨有五德頭有冠象文足有距

象武遇敵則鬪象勇得食相呼象義鳴不失時象信
嘯十五章

孫康著嘯旨一篇云嘯有十五章一曰權與二曰流
雲三曰深溪四曰高蟬五曰空林鬼六曰巫峽猿七
曰下鴻鵠八曰古木鳶九曰龍吟十曰地動十一曰
蘇門十二曰劉公命鬼十三曰阮氏逸韻十四曰正
章十五曰畢章

科第放此風漢

劉蕢楊嗣復門士也按唐登科記寶曆二年楊嗣復放三十五人裴休等時蕢第十五試齊魯會于夾谷賦晦日與同志昆明池泛舟詩及第策直言中官嫉怒仇士良謂嗣復曰奈何以國家科第放此風漢及第耶嗣復懼曰昔與蕢及第時猶未風耳

金華子

來蘇隊舞

杜邠公守揚州耽于游宴宣宗除崔鉉為代以詩送

之曰一方獄市獲來蘇揚州押衙傅希聞御詩即教
習來蘇隊舞以迎崔公杜頗銜之致政歸洛每遇維
揚人必問曰來蘇健否謂傅希也

泥看街樓

李景讓為御史大夫大臣貴戚有看街樓皆泥之畏
其糾彈

亞相辱臺

御史大夫謂之亞相舊說除亞相百日内有人大拜

即謂之辱臺

點頭崔家

崔雍兄弟八人皆登進士一科時號點頭崔家

杜牧改名

杜牧夢人曰爾改名畢未幾而卒

阿武婆阿婆舞

鄭僂出妓以宴趙紳而舞者年已長伶人獻口號云
相公經文復經武常侍好今兼好古昔日曾聞阿武

婆如今却見阿婆舞

龜寶

徐太尉彥若赴廣南渡小海於淺水中得一琉璃瓶
中有一龜及寸旋轉不停而瓶口極細不知何自而
入夜半覺船偏重視之則羣龜重疊登舟遶其瓶徐
懼而棄之後問船主云此名龜寶

李郢詩

江風徹曙不成睡二十五聲秋點長

面部三無

李寬常侍有門下士姓盧善相云李公面部所無者
三無子無宅無塚公有數子皆先公卒有宅在鄉未
嘗得歸死于他州乘其舟而歸舟覆沉其骨

孤進還丹

許崇晚年登第嘗曰自得一第筋骨輕健愈於少年
則知一名乃孤進之還丹

龍王誅水族

父子避于海夜聞哭聲曰昨日龍王有令應水族有尾者斬吾龜也故懼誅而哭又聞哭聲曰汝蝦蟆無尾何哭曰吾今幸無尾但恐便理會蝌蚪時事也

彭祖死

父子見老姥衣衰麓之服哭甚哀父子曰嫗夫誰也曰彭祖父子曰彭祖壽八百而死固不為短可以無恨嫗曰吾夫壽八百誠無恨然又有壽九百而不死者豈不恨耶

淮南子

自然之勢

兩木相摩而然金火相守而流圓者常轉欹者常浮
自然之勢也

所好為禍

善遊者溺善騎者墮各以所好反為自禍

共工觸不周山

共工之力觸不周之山使地東南傾與高辛爭為帝


遂潛于淵越王翳空山越人熏而出之

兵強則滅

兵強則滅木強則折革堅則裂齒堅則先舌而敝柔弱者生之幹堅强者死之徒

病化為虎

牛哀轉病七日化為虎其兄入覘之虎搏殺之



類說卷二十五

欽定四庫全書

子部
類說卷二十六

詳校官中書

臣張姚成

員外郎

臣

牛稔文覆勘

總校官檢討

臣

何思鈞

校對官典簿

臣

劉景岳

謄錄監生

臣

沈疏鳳

欽定四庫全書

類說目錄

卷二十六

國史纂異

暗中摸索

靈運賢

望省樓

國史補

玉樹

北斗化為七僧

王維竊人詩句 擅場

都盧緣撞歌 大蟲老鼠

登華山頂 淮勅惡詩

宰相無德 巫支奇

天堂地獄 麻姑送酒

蛇酒治風 熱風

筆塚 簡則易直則同

元和體 西幸免租稅

婦翁與女婿

裴旻遇真虎

碧落碑

襪而登堦

祿山歎馬嵬

李光弼領兵

出家大丈夫事

隴西李禎

官猪為惡

于公易露布

埋懷村

佛汗

畫鵬

伐兩京道槐

羨西江

上不疑我

王言不存私家 五福太乙

劉關吞人 心疾

唐衢善哭 京兆尹三員

叱僧 毬塲生草

枷有三脫 醫道將行

賣藥宋清 白麥麵

烙黃浸黃 沙堤火城

堂案 堂老

僕射乘馬入省 吏部為省眼

蕭齋

蓮花漏

待漏院

婦人之貴

致仕制

量頸為枷

爭為碑誌

崔昭行賄

白袍子紛紛

先頒試題

第果實名

宋五坦率

蛟龍吹笛

秋夜吹笛

彈五絃

相府蓮

銀鹿

下馬陵

詼諧等著名

刺客

蕃帳烹茶

船鵠

妻報父冤

烘堂

讀書不如寫字

烏絲欄紙

彈琴知音

沉沉聲

博經

窮兵獨舞

功德山

鈇鏤王家

四軍紫

雷狀如屍

蚊母鳥

流桂泉

傷荷藕

後史補

桑落酒訛呼為桑郎

判雜職

詩窖子

黃居難

杜荀鵬

五代史補

文面

楊風子

沒了期

十德啓

牡丹詩

浮石成仙

得得和尚

莊宗撰詞

雀鼠耗

秋日晚望詩

徐寅獻賦

謝魚箋

用桔槔打淚不出

隨狀納命

骰子分兒女

月沉湘浦

銀葉護井

九州歌

拔釘錢

竹枝畫牛背

一字師

武一谷

劫墓賊

旋風偃月

水草大王

賊頭

謬作梁山

無寸道

遶殿雷

鵝生四掌驚生兩裙

十二時中兩度潮

好膏藥

類說目錄

欽定四庫全書

類說卷二十六

宋 曾慥 編

國史纂異

暗中摸索

許敬宗性輕見人多忘之乃曰卿自難記若遇劉沈
曹謝暗中摸索亦可識

玉樹

雲陽縣多漢離宮故事有樹似槐而葉細士人悉謂

之玉樹揚雄甘泉賦云玉樹青蔥而左思以為假稱
珍怪者非實也似之而已

靈運鬚

謝靈運美鬚臨刑施南海祇園寺為維摩詰鬚寺中
寶惜中宗時安樂公主五日鬪百草遣人取之仍剪
棄其餘

北斗化為七僧

李淳風奏北斗七星官化為人明日至西市飲酒使

人候之有七僧共飲二石太宗遣人名之七僧笑曰
此必李淳風小兒言我也忽不見

望省樓

崔日知恨不居八座為太常卿起樓與尚書省相對
人謂崔公望省樓

國史補

王維竊人詩句

王維好佛故字摩詰性致高遠得宋之問輞川別業

山水絕勝今清涼寺是也維有詩名然好竊人詩句
如行到水窮處坐看雲起時英華集中詩也漠漠水
田飛白鷺陰陰夏木轉黃鸝李嘉祐詩也

擅場

唐人燕集必賦詩推一人擅場郭曖尚升平公主盛
集李端擅場送劉相廵江淮錢起擅場

都盧緣撞歌

元載久擅權客有為都盧緣撞歌述其危殆以諷之

載覽之泣下

大蟲老鼠

陸長源以舊德為宣武行軍司馬韓愈為巡官同任使局或譏其年輩相懸愈曰大蟲老鼠俱為十二相屬何相懸之有

登華山頂

韓退之好奇與客登華山絕峯不可返發狂大慟華陰令百計取之得下

准勅惡詩

德宗晚年詩頗工杜太保在淮南進崔叔清詩百篇
帝曰此惡詩何用進時謂准勅惡詩

宰相無德

郝昂與韋陟友善因話國朝宰相陟曰誰最無德昂
曰韋安石也已而驚走出逢吉溫溫問何此蒼黃答
曰適與韋尚書話宰相最無德者欲言吉頊誤言韋
安石既而鞭馬又走抵房相之第瑄執手問慰之復

以房融為對昂一日三犯人惟韋陟遂與之絕

巫支奇

楚州有漁者淮中釣得古鏢不絕刺史李湯大集人力引之鏢窮有獼猴躍出復沒後驗山海經云水獸好為害禹鏢之名巫支奇

天堂地獄

李丹曰釋迦生中國設教如周孔周孔生西方設教如釋迦天堂無則已有則君子登地獄無則已有則

小人入

麻姑送酒

李泌以虛誕自任嘗對客曰令家人洒掃今夜洪崖先生來有人遺美酒會有客至乃曰麻姑送酒來與君同傾未畢門者云某侍郎取榼子泌命倒還略無作色

蛇酒治風

李丹之弟患風或云蛇酒治風乃求黑蛇生置甕中

醞以麴藥數日蛇聲不絕及熟香氣酷烈引滿而飲
斯須化為水惟毛髮存焉

熱風

鄭雲達與王彥伯隣居嘗有客求醫誤謁雲達達診
候曰熱風頗甚客又請藥方曰不如東家王供奉客
驚走自是有乖宜者即云熱風

筆塚

長沙僧懷素好草書自言得草書三昧棄筆堆積埋

山下號筆塚

簡則易直則同

羅浮王生人問為政難易生曰簡則易又問儒釋同道否曰直則同

元和體

元和後文筆學奇于韓愈學澁于樊宗師歌行則學流蕩于張籍詩則學矯激于孟郊學淺切于白居易學淫靡于元稹俱名元和體大抵天寶之風尚實太厯之

風尚淳貞元之風尚蕩元和之風尚怪也

西幸免租稅

明皇欲西幸裴耀卿張九齡諫曰百姓場圃未畢李
林甫曰二京陛下東西宮也焉用擇時如妨刈穫獨
可蠲免沿路租稅上大悅即日西幸長安旬日張裴
俱罷而牛仙客進焉

婦翁與女婿

張垺張均俱在翰林垺以尚主獨賜珍玩均曰此婦

翁與女婿非天子賜學士也

裴旻遇真虎

旻守北平地多虎旻善射一日斃三十餘虎老父曰此彪也似虎而非旻曰真虎安在父曰北去有之旻躍馬而往叢薄有虎躍出小而驚猛一吼山石震動旻人馬辟易弓矢墜幾不免自是不復射

碧落碑

絳州有碑篆字與古文不同上有碧落二字人謂之

碧落碑

襪而登階

韋陟有疾房尚書使子弟問之卧內悉籍茵毯襪而

登階侍婢皆笑

祿山歎馬嵬

安祿山聞楊妃馬嵬之死數日歎惋林甫養育之國

忠激怒之然其他腸有所自也

李光弼領兵

郭汾陽自河陽入李太尉代領其兵舊營壘也舊士卒也舊旗幟也光弼一號令而精米皆變

出家大丈夫事

崔趙公問徑山曰弟子出家否答曰出家大丈夫事非將相所為

隴西李禎

嘗以爵位不如族望官至刺史與人書唯稱隴西李禎

官猪為患

盧杞除虢州刺史奏言虢有官猪數千頗為人患上
曰移于沙苑何如對曰同州豈非陛下百姓為患一
也無用之物與人食之為便德宗曰卿理虢州憂他
處百姓宰相材也由是有意用杞

于公易露布

德宗覽收京城露布至臣肅清宮禁祇謁陵園鐘簴
不移廟貌如故感涕失聲露布于公易之詞也公易

後為陸贄所忌誣以家行不至賜孝經一卷坎壈而終朝野惜之

埋懷村

馬燧討李懷光引兵下營問其地名埋懷村喜曰擒賊必矣果然

佛汗

汴州相國寺言佛有汗劉元佐自持金帛以施復起齋場士庶競集輸施唯恐不及所得數萬以贍軍

畫鵬

裴延齡恃恩輕躁顧少連畫一鵬羣鳥噪之以獻上
上知衆怒竟不大用

伐兩京道槐

貞元中度支欲取兩京道槐樹為薪渭南尉張造答
曰召伯所憩尚勿剪除先皇舊游豈宜斫伐乃止

羨西江

陸羽少事竟陵禪師師去世作寄情云不羨白玉璫

不羨黃金壘亦不羨朝入省亦不羨暮入臺千羨萬羨西江水曾向竟陵城下來

上不疑我

德宗自復宮闕常恐生事姑息藩鎮唯渾令公奏事不遂喜曰上不疑我

王言不存私家

高貞公為中書舍人家無制草曰王言不可存於私家

五福太乙

元和中陰陽家言五福太乙在蜀故劉闢造五福樓
符載為記曰耳聞天語目視鳥背

劉闢吞人

劉闢初患心疾人自外至輒欲吞之同府崔佐時肥
碩闢據地而吞

心疾

韋緩李蟠俱以心疾廢韋常疑遇毒鑠井而飲李益

少而疑病亦心疾也心靈府也為外物所中終身不
痊多思慮多疑惑病之本也

唐衢善哭

唐衢老而無成善哭音調哀切聞者泣下太原享軍
酒酣乃哭滿坐不樂主人為之罷宴

京兆尹三員

憲宗久親政事忽問京兆尹有幾員李吉甫對京兆
尹三員一員大尹二員少尹人以為善對

叱僧

韋貫之為右丞內僧廣宣造門曰閣下不久拜相貫之叱曰安得不軌之言命筆草奏僧惶恐而去

毬場生草

憲宗問趙宗儒曰人言卿在荊州毬場生草何也對曰草生不妨毬子上笑

柳有三脫

王悅為整屋鎮將軍士犯禁柳之百日乃脫未及百

日而脫者有三我死則脫爾死則脫天子之命則脫
由是秋毫不犯

醫道將行

王彥伯醫道將行煮藥于庭老幼塞門彥伯指曰熱
者飲此寒者飲此氣者飲此翼日各持金帛來酬取
之無不效者

賣藥宋清

宋清賣藥長安市朝官出入移貶輒買藥遺送貧士

請藥常多折券人有急難傾財救之歲計所入亦百
倍故長安言人有義聲賣藥宋清

白麥麵

竇氏盛時有奴厚歛羣從之資供白麥麵醫云白麥
性平由是恣食未嘗疾後有告奴所輸乃常麥羣從
一時暴熱皆作

烙黃浸黃

故老云五十年多患熱黃坊曲舊有大開其門以烙

黃為業者灞澇水中嘗有晝坐至暮謂之浸黃近代
悉無而患腰脚疑茶所為也

沙堤火城

凡拜相禮絕班行自子城東至府第載沙填路名曰
沙堤或百僚問疾有司設幕次排班元日冬至立秋
百官皆備珂傘列燭至五六百炬謂之火城宰相將
至火城皆撲滅以避之

堂案

宰相判事有堂案處分百司曰堂帖以次押名曰花押黃勅既下有小異同曰帖黃

堂老

宰相相呼曰堂老兩省相呼為閣老丞郎相呼曰曹長郎中員外御史遺補相呼為院長惟侍御史相呼為端公

僕射乘馬入省

南省故事左右僕射上宰相送御史捧案員外郎捧

筆殿中侍御史押門自丞郎御史中丞皆受拜朝論
以為比肩事主儀注太重元和以後悉去舊禮唯乘
馬入省門如故

吏部為省眼

禮部為南省舍人考功度支為振行比部得廊下食
以飯役者號比盤二十四曹呼左右司為都公省中
語曰後行祠部不博中行都門中行刑戶不博前行
駕庫

蕭齋

梁武帝造寺令蕭子雲飛白大書蕭字至今一字存焉李約竭產自江淮買歸東洛建一室以翫之號為蕭齋

蓮花漏

越僧靈徹取銅葉製器為蓮花漏置盆水之上底孔漏水半之則沉每晝夜十二沉為行道之正節

待漏院

舊百官早朝立馬望仙門外宰相於光宅車坊以避
風雨元和初置待漏院

婦人之貴

苗夫人其父太師其舅張河東其夫延賞其子宏靖
其婿韋臯近代婦人之貴無如此者

致仕制

高貞公致仕制云以年致仕則有前聞近代寡廉罕
由斯道時杜司徒年過七十無意請老裴晉公知舍

人以此而譏之

量頸為枷

李銛錡之役弟為宋州刺史聞錡反狀慟哭悉驅妻子奴婢無長幼量頸為枷自拘於觀察使朝廷憫之薄貶而已

爭為碑誌

長安中爭為碑若市賈大官薨逝其門如市至有喧競不由喪家裴均之子乞銘于韋相縑帛萬疋貫之

曰寧死不苟為之

崔昭行賄

裴吉云少時姑夫為朝官有雅望朝退歎曰崔昭何人衆口稱美此必行賄也如此安得不亂言未訖門者報壽州崔郎中候謁姑夫怒喝門者將鞭之良久彊出須臾命茶甚急又命酒果又令秣馬飼僕吉曰何前倨而後恭也及入門有得色乃昭贈官絹千疋白袍子紛紛

有客譏宋濟曰近日白袍子何太紛紛濟曰由緋袍子紫袍子紛紛化使然也

先頒試題

建中初裴冀曰若使禮部先時頒天下曰某年試某題取某史至期果然亦勤學之一術也

第果實名

李直方常第果實名以綠李為首櫻梨為副櫻桃為三柑子為四蒲桃為五或薦荔枝曰寄舉之首

宋五坦率

宋濟老於文場試賦失韻乃撫膺曰宋五又坦率矣

後禮部上甲乙名德宗曰宋五坦率否

盧氏雜說少異

蛟龍吹笛

李舟得林舍烟竹截以為笛緊如鐵石以遺李牟牟吹笛天下第一月夜泛舟吹之俄有客呼船請載既至請吹之其聲清壯山石可裂及入破呼吸盤擗應聲粉碎客或不見疑蛟龍也

秋夜吹笛

李牟秋夜吹笛於瓜州初發調羣動皆息及數奏微風颯至俄頃舟中賈人有怨歎悲泣之聲

彈五絃

趙璧彈五絃曰吾始則心驅之中則神遇之終則天隨之浩然眼如耳耳如鼻不知五絃之為璧而璧之為五絃也

相府蓮

于頔以樂曲有相夫怜其名不雅客曰南朝相府曾有瑞蓮故號相府蓮後語訛耳

銀鹿

顏峴家僮名銀鹿後事魯公終身

下馬陵

董仲舒墓門人至皆下馬謂之下馬陵語訛為蝦蟆陵也

詼諧等著名

詠諧賀知章輕薄祖詠顓語賀蘭廣詠字蕭昕寓言
李紆隱語張著機警李舟歇後姚峴語訛映帶李直
方目人曹著

刺客

天下未有兵甲多刺客李勉為開封尉獄囚有意氣
者勉縱而逸之後客遊河北偶見故囚迎歸厚待之
告其妻曰此活我者何以報德妻曰千鰓可乎曰未
二千匹可乎曰未也妻曰不如殺之其僮哀勉密告

之乃逸去夜半至津店老父曰此多猛獸何敢夜行
勉言其故梁上有人瞥下曰幾誤殺長者乃去未明
攜故四夫妻二首以示勉

蕃帳烹茶

党魯使西蕃烹茶帳中魯曰滌煩消渴所謂茶也蕃
人曰我亦有之乃出數品此壽春者此顧渚者此蘄
春者

舶鴿

船舶發海路必養鴿舶沒雖數千里亦能歸其家

妾報父冤

貞元中長安有買妾者數年忽不知所之一夜提人首至告其夫曰我有父冤故於此今報矣請歸涕泣而訣出門如風俄頃復至斷所生二子喉而去

烘堂

凡上堂絕言笑有不可忍雜端大笑則合坐皆笑謂之烘堂也

讀書不如寫字

張參手寫九經每言讀書不如寫字

烏絲欄紙

宋毫間有紙織成界道者謂之烏絲欄紙

彈琴知音

于頔令客彈琴其嫂知音曰三分中一分箏聲二分

琵琶全無琴韻

沉汎聲

董廷蘭善為沉聲汎聲皆琴聲也

博經

貞元中宋清進博經一卷強力爭勝謂之捺零假借
錢帛謂之囊家什一而取謂之乞頭

窮兵獨舞

于頔聞韋臯進奉聖樂亦撰順聖樂以進曲半行綴
皆伏而一人舞于中幕客韋綬曰何用窮兵獨舞以
諷頔頔為襄帥暴虐人呼襄樣節度

功德山

韓晉公謁徑山出妻拜之乞一號徑山曰功德山

銀鏤王家

四姓滎陽鄭崗頭盧澤底李士門崔皆為鼎甲太原王亦四姓之匹呼為銀鏤王家喻銀質而金飾也

四軍紫

貞元中有四行軍自為賜紫登郎署呼為四軍紫

雷狀如鼗

雷州春夏多雷秋冬伏地中其狀如鼯人取食之亦有雷斧雷墨可以入藥

蚊母鳥

江南有蚊母鳥夏月夜鳴吐蚊於叢葦中又有蚊樹類枇杷熟則蚊出

流桂泉

南中有泉多桂泉後乃立屋為漢祖廟又有子胥廟其像分鬚為五並有靈應

傷荷藕

蘇州進藕最上者為傷荷欲長其根故傷其葉也

後史補

桑落酒

河中有桑落坊有井每至桑落時取其寒暄得所以
井水釀酒甚佳樂天詩云桑落氣薰珠翠暖柘枝聲
引筦弦高號桑落酒舊京人呼為索郎蓋語訛耳

判雜職

李自誠為長葛宰一雜職犯過乃戲判曰豈有終日
執之而不知其味者乎

詩窖子

王仁裕著詩萬首謂之詩窖子亦曰千篇集

黃居難

有舉子好為詩章每通名刺云鄉貢進士黃居難字
樂地欲比白居易字樂天也又有張碧者業歌詩云
與李白為對

杜荀鴨

梁園有富家子杜四郎好接文士愛為詩篇時號杜荀鴨以比荀鶴每有詩即題壁親賓或汙漫之即云三十年來塵撲面如今始得一塗泥

五代史補

文面

健兒文面自梁太祖始

楊風子

楊涉送傳國寶于太祖其子凝式諫不聽恐事泄即佯狂號風子

沒了期

錢鏐封吳越國王工役大興士卒嗟怨或夜書府門曰沒了期沒了期修城纔了又開池鏐出見之命吏書曰沒了期沒了期春衣纔罷又冬衣嗟怨頓息

十德啓

鍾傳起于商販尤重學士萬浩因擇其行事赫赫者

十條形于啓事以投之謂之十德啓傳每一字酬一
千凡五千緡

牡丹詩

曹唐羅隱皆有詩名隱題牡丹云若教解語應傾國
任是無情也動人唐曰此乃詠子女障子耳隱曰猶
勝足下作鬼詩乃誦唐漢武帝宴西王母詩曰樹底
有春寂寂人間無路月茫茫豈非鬼詩唐無以對
浮石成仙

爾朱先生功行甚至遇異人與藥一九若見浮石而後服之則仙道成矣先生如教每遇一石必投諸水後峽上渡江有叟艤舟相待問其姓曰石氏問地所屬曰涪州先生豁然而悟遂服藥即時輕舉

得得和尚

僧貫休入蜀上建詩曰一瓶一鉢垂垂老千水千山得得來建大悅賜號禪月因名為得得和尚

莊宗撰詞

莊宗雅好音律凡用軍前後隊伍皆自撰詞使揭聲而鳴唱至入于陣不問勝負馬頭纔轉衆樂齊舉故人忘其死亦用兵之一奇也

雀鼠耗

明宗幸倉場每石加二斗耗以備雀鼠侵蠹謂之雀鼠耗倉場加耗自此始

秋日晚望詩

何仲舉能詩李臯對仲舉吟其秋日晚望詩云樹迎

高鳥歸深野雲傍斜陽過幾山乃以足扣地曰仲舉
詩家之高逸者其餘奴兵乃閏氣耳

徐寅獻賦

徐寅獻太祖東遊大梁賦時太祖與太原武皇為讐
敵而武皇眇一目又出沙陀部落欲媚梁祖其詞云
一眼沙陀望英威而膽落莊宗滅梁寅在閩中王審
知戒閹者不得引接寅坐是止於秘書省正字

謝魚牋

黃滔為王審知推官審知遺之魚徐寅代為謝牋曰
銜諸斷索纔從羊續懸來列在雕盤便到馮驩食處
時大稱之

用桔槔打淚不出

敬新磨河東伶人莊宗出自沙陀部既得天下左右
侍衛多用蕃部子弟高鼻深目者甚衆新磨每譏之
衆皆切齒訴于莊宗泣下莊宗以責新磨新磨曰此
輩淚用桔槔打亦不出莊宗大笑

隨狀納命

李濤嘗怒張彥澤上疏請誅彥澤後契丹南侵至中
渡橋彥澤首降先入京師乃挾宿憾殺開封尹桑維
翰濤聞之自寫狀求見彥澤云上疏請殺太尉人李
濤謹隨狀納命彥澤欣然卒善待之

骰子分兒女

戴偃能詩自稱玄黃子馬氏有國至文昭尤好奢侈
偃著漁父百篇以諷由是不遇凍餓日侵謂妻曰與

汝結髮生一男一女今恐擠于溝壑宜分兒女遞去
於是舉骰子與妻約曰采多者得兒偃擲采少乃攜
女慟別

月沉湘浦

石文德工詩馬文昭以其貌寢未嘗接待南宅王子
延之門下無何彭夫人薨文昭傷悼文德獻挽詞有
云月沉湘浦冷花謝漢宮秋文昭驚曰文德有如此
作用吾反不如南宅小兒知鑒耶乃接見之

銀葉護井

高郁為武穆王謀臣貪而僭常患所居三井不甚清
徹乃用銀葉護井四面內外皆徧拓裏其奉過差皆
此之類也

九州歌

歐陽彬謁湖南馬氏不得通有妓瑞卿慕其才延之
於家時湖南舊管七州後加武陵岳陽為九州瑞卿
歌之武穆竟不問彬遂入蜀

拔釘錢

趙在禮在宋州所為不法百姓苦之一日制下移鎮永興百姓相賀曰眼中拔却釘也可不快哉在禮聞之上表乞還鎮朝廷許之在禮每口率錢一千號為拔釘錢遂獲有百萬

竹枝畫牛背

僧齊己長沙人七歲穎悟為大瀋山寺司牧往往杼思以竹枝畫牛背為篇什衆僧奇之遂令出家

一字師

鄭谷在袁州府齊已攜詩詣之有早梅詩云前村深
雪裏昨夜數枝開谷曰數枝非早也未若一枝齊已
不覺投拜自是士林以谷為一字師

武一谷

武行德以採樵為業而甚有力自謂一谷之薪可以
盡負鄉里號武一谷

刼墓賊

廖凝覽裴說經杜工部墓詩曰擬鑿孤墳破重教大
雅生笑曰裴說却墓賊耳

旋風偃月

李臯與弟節俱在湖南幕下為馬氏作謝戰馬李臯
曰馬有旋風之隊安得一對節曰軍有偃月之營臯
乃云驟尋偃月之營擺作旋風之陣

水草大王

李儼為鳳翔節度因生辰秦鳳持禮使陋而多髯魏

博使少年如美婦人魏博使戲曰今日與水草大王
接席秦鳳曰夫人無多言四座皆笑

賊頭

王仁裕乾祐初放榜二百一十四人作詩曰二百一
十四門生春風纔長羽毛成擲金換作天邊貴鑿壁
偷將榜上名陶尚書見詩曰不意王仁裕今日為賊
頭也

謬作梁山

李濤弟濬娶得婦婦拜濤濤曰愧無子建謬作梁山聞者絕倒

無寸道

馮道在中書舉人李導投贄見之道責導不避名導曰相公是無寸底道道了無所怒

遶殿雷

馮道之子能彈琵琶以皮為弦世宗令彈深善之因號琵琶為遶殿雷

鵝生四脚鰲生兩裙


僧謙光有才辨而飲酒食肉嘗云老僧無他願但願
鵝生四脚鰲生兩裙足矣

十二時中兩度潮

閩僧契盈陪吳越王登淶波亭王喜曰三千里外一
條水契盈曰十二時中兩度潮人以為切對時兩浙
貢賦自海路至青州出故云三千里

好膏藥

王建方許下不逞嘗坐事遭徒但無杖痕耳及據蜀
乃袒背示從事馮涓欲自辯涓撫其背曰大奇大奇
何處得此好膏藥



類說卷二十六